

Evening Dogri News

12th June 2024

1815 hrs

Headlines

1 कठुआ जिले दे हीरानगर इलाके च छिड़े दे टाकरे च दऊं आतंकवादिणं दा सफाया, इक सीआरपीएफ जवान शहीद। जम्मू जोन दे एडीजीपी होरें आखेआ जे टाकरा खत्म होई गोआ ऐ प88 इलाके च तुपाई अभियान अजें जारी ऐ।

2 कठुआ दे जिला विकास कमीशनर होरें जिले च श्री अमरनाथ जी दी यात्रा लेई तैआरिणं दा जायजा लैता, लखनपुर च 24 घैंटे कम्म करने आला यात्री सुविधा केन्द्र, आईएफआईडी कार्ड जारी करने आले 12 काउंटर ते यात्रिणं दे ठैहरने लेई 36 केन्द्रें दी बवस्था कीती जा'रदी ऐ।

3 18मीं लोकसभा दा पैहला इजलास 24 जून गी शुरू होआ'रदा ऐ।

4 सख्त सुरक्षा बंदोबस्तें हेठ 5 ज्हार कोला मते श्रद्धालु सलाना क्षीर भवानी मेले च शामिल होने लेई जम्मू थमां घाटी लेई रवाना।

<><><><><><>

Kathua-Doda Attack

कठुआ जिले दे हीरानगर इलाके च इक घरें अंदर बड़े दे आतंकवादिणं कन्नै कल संजा छिड़े दे इक टाकरे च दऊं आतंकवादी मारे गे न ते सीआरपीएफ दा इक जुआन शहीद होइ गोआ ऐ जिसलै जे इस कारवाई दरान इक आम नागरिक दे घायल होने दी बी खबर ऐ। जानकारी मूजब एह आतंकवादी हाल च गै बन्ने पारा घुसपैठ करियै आए दे हे ते कूटा मोड़ सैयदा सुखल ग्रां च एह लोक इक घरें अंदर बड़ी गे हे जेह्दे बाद टाकरा भखी गोआ हा। अज्ज बडलै मूह् न्हरे परतियै टाकरे आले थाहरै पर गोलीबारी शुरू होई जेह्दे च सीआरपीएफ दा इक कांस्टेबल जख्मी होई गोआ जिसी हीरानगर दे उप-जिला अस्पताल पजाया गोआ जित्थें जख्में दी ताब नेई जरदे होई ओह वीर गति गी प्राप्त होई गोआ। इस बारे तफसीली जानकारी दिंदे होई जम्मू जोन दे एडीजीपी आनंद जैन होरें अज्ज दस्सेआ जे हीरानगर टाकरे च दऊं आतंकवादी मारे गे न ते सीआरपीएफ दा इक जुआन शहीद होआ ऐ, पर इलाके च तुपाई अजें जारी ऐ ते कारवाई गी अजें खत्म घोषत नेई कीता गेदा ऐ। एडीजीपी होरें उआं दस्सेआ जे कल संजा लै शुरू होए दा टाकरा अज्ज दपैहरी खत्म होआ ऐ। पर अभियान अजें खत्म नेई कीता गेदा की जे किश होर आतंकवादिणं दे उत्थें छप्पे होने दी शैंका गी नजर अंदाज नेई कीता जाई सकदा। कारवाई दरान घायल आम नागरिक दी हालत बारे उनें आखेआ जे ओह खतरे शा बाहर ऐ। उनें दस्सेआ जे मारे गेदे आतंकवादिणं कशा ग्रनेड, आईईडी विस्फोटक, अमरीका च बनी दी एम-फोर कारबाइन ते होर दुआ समेयान बरामद कीता गोआ ऐ।

<><><><><><>

Doda

भद्रवाह दे छत्तरगला च जंदी रातीं फौज दी चौकी पर होए दे आतंकी हमले मगरा समूलचे डोडा जिले च सुरक्षा निगर करी दित्ती गई ऐ। इस हमले च सेना दे 5 जुआन जख्मी होइ गे। पिछले 20 ब'रें च एह सब्बने शा बड़डा हमला मन्नेआ जा'रदा ऐ। साढ़े जिला संवाददाता फयाज पम्पोरी होरें जानकारी दित्ती ऐ जे सुरक्षाबलें डोडा भद्रवाह जरनैली शिड़क दे इलावा होर केई थाहरें उप्पर नाके लाए न ते सब्बने गड्डिणं दी जांच कीती जा'रदी ऐ। घायल होए दे जुआनें गी इलाज लेई अस्पताल भर्ती कीता गेदा ऐ ते इलाके च आतंकवादिणं गी फगडने लेई तपाशी अभियान चलाया जा'रदा ऐ। मकामी लोकें गी सुरक्षा बलें दा सैहयोग करने ते कुसा बी संदिग्ध गतिविधिणं बारे जानकारी सांझी करने दी सलाह दित्ती गई ऐ।

SANJY-Kathua

कठुआ दे डिप्टी कमीशनर राकेश मिन्हास होरें कल सरबंधत विभागें कन्नै बैठक लोआइयै औंदी श्री अमरनाथ यात्रा लेई कीती जा'रदिणं तैआरिणं दा जायजा लैता। इस दरान डीसी होरें मुत्तलका विभागें गी निर्देश दित्ते जे सब्बने बकाया कम्मं गी यात्रा थमां पैहले मुकम्मल करी लैता जा। बैठक च एह फैसला बी कीती गेआ जे जिला प्रशासन कठुआ खराब मौसम जां कुसा होर आपात स्थिति करी यात्रा रूकने दी स्थिति च 12 ज्हार 500 यात्रुएं दे रौहने दा इंतजाम करने लेई इक आपात योजना तैआर करे, जेहदे तैहत 36 ठैहरने आले केन्द्र स्थापत कीते जांगन। आरआईएफडी टैगें गी पंजीकृत यात्रुएं गी जारी करने बारे जिला प्रशासन नै फैसला कीता जे इसी जारी करने आले बाहु काउंटर लखनपुर सुविधा केन्द्र च खोले जांगन तां जे इसी लेइयै जम्मू आधार शिविर च यात्रुएं दा मता रश नेई होई जा। डीसी होरें सरबंधत विभागें गी पीने आले पानी, बिजली, सेहत सुविधाएं, साफ सफाई, शौचालय, लंगर ते रिहायशी ठकाने, यातायात प्रबंधन ते सुरक्षा प्रबंधें लेई व्यापक योजना तैआर करने लेई गलाया। उनें सब्बने विभागें गी आपसी तालमेल बनाइयै कम्म करने दे बी निर्देश जारी कीते।

<><><><><><>

SANJY-Samba

सांबा दे डिप्टी कमीशनर अभिषेक शर्मा होरें कल डीसी दफतर दे कांफ्रेंस हाल च इक बैठक लोआइयै औंदी श्री अमरनाथ जी दी यात्रा 2024 लेई कीते जा'रदे प्रबंधें ते सुरक्षा इंतजामें दा जायजा लैता। इस मौके उप्पर एसएसपी विनय कुमार होरें यात्रुएं दे ठैहरने आले केन्द्र ते जरनैली शिडक उप्पर कीते जा'रदे सुरक्षा प्रबंधें बारे तफसीली जानकारी दित्ती। अतिरिक्त डिप्टी कमीशनर सुरेश शर्माहोरें बैठक च यात्रुएं दे ठैहरने आले 26एं केन्द्रें च दित्ती जाने आली सुविधाएं जियां बिस्तरें, पानी, बिजली, शौचालय, साफ सफाई ते रूट्टी दे प्रबंधें बारे व्यापक जानकारी सांझी कीती। डीसी होरें चीची माता ते नोनाथ च यात्रुएं दी सहूलत लेई दो आरआईएफडी काउंटर खडेरने दा सुआगत कीता।

<><><><><><>

DC-Eid

जम्मू दे डिप्टी कमीशनर सचिन कुमार वैश्य होरें कल इक बैठक लोआइयै औंदी ईद उल अजहा लेई कीते जा'रदे प्रबंधें दा जायजा लैता। बैठक च बक्ख-बक्ख विभागें दे जिला अधिकारिणं हिससा लैता। इस दरान जम्मू नगर निगम गी निर्देश दित्ते गे जे शैहर च साफ सफाई दे निगगर बंदोबस्त कीते जान। खुराक ते सार्वजनिक बं डते बिक्री मैहकमे ते भिड्ड पालन विभाग गी बी बजारें च जरूरी चीजें बस्ते दे म्यार दी जांच दे निर्देश दितते गे। एहदे इलावा जरूरी सहूलतां जियां पीने आला पानी ते बिजली दी सप्लाई गी बी ध्यार आले दिन बिजन कटौती दे लोकें तगर पजाने दे निर्देश जारी कीते गे। डीसी होरें सब्बने विभागें गी आपसी तालमेल बनाइयै कम्म करने लेई गलाया।

<><><><><><>

PM-Yoga

प्रधानमंत्री नरेन्द्र मोदी होरें औंदे योगा दिवस गी दिक्खदे होई अज्ज अपने सोशल मीडिया पोस्ट उप्पर वृक्षासन योगा दी वीडियो सांझी कीती जेहदे च उनें इस आसन दे बक्ख-बक्ख फायदे बारे जानकारी दित्ती। उनें गलाया जे वृक्षासन करने दे बक्ख-बक्ख फायदे न, एहदे करी साढ़े शरीर तवाजन बनदा ऐ ते साढ़े बौहने ते खडोने दे तरीके च बी सकरात्मक बदलाव औंदा ऐ।

<><><><><><>

Parliament

18मीं लोकसभा दा पैहला सत्र इस म्हीने दी 24 तरीक कोला शुरू होआरदा ऐ। इस सत्र च नमें चनोए दे मिंबरे गी सगंध चुकाई जाग ते लोकसभा अध्यक्ष दा चुनां कीता जाग। इस इजलास दी शुरूआत राष्ट्रपति द्रौपदी मुर्मू हुंदे आस्सेआ दौनें सदनें गी सांझे तौरा पर संबोधत कीते जाने कन्नै होग। जेहदे मगरा उंदे अभिभाषण पर चर्चा होग। राज्यसभा दा इजलास बी इस म्हीने दी 27 तरीक कोला शुरू होग। संसद दा एह इजलास अगले म्हीने दी 3 तरीक तोड़ी चलोग। संसदीय कार्ज मंत्री किरन रिजिजू होरें एह जानकारी इक सोशल मीडिया पोस्ट पर दित्ती ऐ। उनें आखेआ जे देसै दी जनता नै चुनाएं दरान वोट पाइयै अपना फैसला सनाई दित्ता ऐ ते हून देस दी सेवा लेई कम्म करना साढा फर्ज ऐ। रिजिजू होरें आखेआ जे 140 करोड़ भारतवासिएं दिएं आसें—तागें गी पूरा करने लेई चर्चा ते सोच बचार करने लेई संसद इक आदर्श मंच ऐ।



Mela Kheer Bhawani

कश्मीर च लगने आले सलाना क्षीर भवानी मेले च शामिल होने लेई कोई 5 ज्हार कोला मते लोक अज्ज जम्मू थमां रवाना होए जिंदे च ज्यादातर कश्मीरी पंडत समुदाय दे लोक शामिल न। आकाशवाणी दे जम्मू संवाददाता नै जानकारी दित्ती जे श्रद्धालुएं गी जम्मू शैहरा दे बाहरले इलाके नगरौटा मिमां डिवीजनल कमीशनर जम्मू रमेश कुमार, कश्मीरी विस्थापतें सरबंधी रलीफ, कमीशनर डॉ. अरविंद कारवानी ते केई कश्मीरी पंडत लीडरें, गी झंडी दस्सियै रवाना कीता। सलाना क्षीर भवानी मेला जेठ म्हीने दी अष्टमी आले रोज 14 जून गी गांदरबल च तुलमुला, कुपवाडा च टिककर, अनंतनाग च लक्तीपोरा ऐश मकाम, कुलगाम च माता त्रिपुर सुंदरी देवसर ते कुलगाम च गै माता क्षीर भवानी मंजगाम बी मनाया जंदा ऐ। श्री अमरनाथें दी यात्रा दे बाद कश्मीर घाटी च हिंदुएं दा एह सब्बने शा बड्डा ध्यार मन्नेआ जंदा ऐ जेहदी जम्मू कश्मीर च बड़ी मती मानता ते महत्ता ऐ।



Ministers

निर्मला सीतारमण होरें अज्ज नमीं दिल्ली च वित्त ते बपार मामले दे केन्द्रीय मंत्री दा कार्यकाल सांभेआ ऐ। उनें प्रधानमंत्री नरेन्द्र मोदी हुंदा धन्नबाद कीता जे मोदी होरें इक बारी परतियै उंदे उप्पर विश्वास जतांदे होई उनेंगी केन्द्रीय वित्त ते बपार मामले दे मंत्री दे रूपै च कम्म करने दा मौका दित्ता। तोआई नितिन गडकरी होरें बी अज्ज शिडक यातायात ते हाइवे मंत्री दा पदभार ग्रहण कीता। इस मौके उप्पर बोलदे होई गडकरी होरें प्रधानमंत्री नरेन्द्र मोदी हुंदा आभार प्रगट कीता जे उनें अपने त्रीये कार्यकाल च उनेंगी इक बारी परतियै अपनियां सेवा देने दा मौका दित्ता ऐ।



Naidu Sworn In

तेलगुदेशम पार्टी दे प्रमुख नारा चन्द्रबाबू नायडू होरें अज्ज कृष्णा जिले दे केसरपल्ली च आंध्रप्रदेश दे नमें मुखमंत्री दे तौरा पर सगंध चुककी। शपथ ग्रहण समारोह च प्रधानमंत्री नरेन्द्र मोदी, केन्द्री मंत्री अमित शाह, राष्ट्रीय जनतांत्रिक गठबंधन दे केई होर नेता शामिल होए। आंध्रप्रदेश दे राज्यपाल एस.अब्दुल नजीर होरें बडलै 11 बज्जियै 27 मिंटे पर उनेंगी मुखमंत्री दे औहदे ते राजदारी दी सगंध चुकाई। एहदे इलावा इस मौके मजूद होरने 24 लीडरें जिनेंगी सगंध चुकोई गेई उंदे च जन सेना पार्टी दे प्रमुख के.पवन कल्याण, टीडीपी दे महासचिव नारा लोकेश ते बीजेपी दे वरिष्ठ लीडर सत्य कुमार यादव प्रमुख न।



NEET

राष्ट्रीय परीक्षा अर्जेसी नै नीट 2024 परीक्षा दे नतीजे दी घोषणा मगरा आम तौरा उप्पर पुच्छे जाने आले सुआले दी सूचि जारी कीती ऐ। इस म्हीने दी 4 तरीक गी घोषत कीते गेदे नीट नतीजे च कथित गड़बड़िएं गी दिक्खदे होई एह प्रश्नावली जारी कीती गई ऐ। मतेयान देने आले विद्यार्थिएं गी समें दी हानि लेई कंपेनस्टरी नंबर देने च शकैत निवारण समिति दी भूमका उप्पर अर्जेसी नै गलाया जे इक समिति दा गठन कीता गेआ हा। समिति नै त्थयात्मक रिपोर्ट दे आधार उप्पर शकैतें उप्पर बचार कीता, जे कोई बी परीक्षार्थी, परीक्षा च 118 ते 119 नंबर किया हासल करी सकदा ऐ। इस सुआला दे परते च अर्जेसी नै स्पष्ट कीता जे कंपेनस्टरी नंबरें करी दो विद्यार्थिएं गी 118 ते 119 नंबर हासल होए। केन्द्रीय मंत्रिमंडल नै नीट परीक्षा च 1 जहार 500 शा मते परीक्षार्थिएं गी दित्ते गेदे ग्रेस मार्से दी समीक्षा लेई 4 सदस्यें दे पैनल दा गठन कीता ऐ।

<><><><><><>

India

विश्व बैंक दी ताजा रिपोर्ट मूजब भारत अगले 3 वित्तिय ब'रे च 6.7 फीसदी स्थिर विकास दर कन्नै विश्व दी सब्बने शा तेजिया कन्नै बघने आली अर्थबवस्था बनी दी रौहग। एह वृद्धि घरेलू मंग, निवेश च बघदे ते सेवा क्षेत्र कन्ने जुड़ी दी गतिविधिएं कन्नै प्रेरित ऐ।

<><><><><><>